

Treoirlínte d'iarratasóirí

Scéim na bhFeilte 2024 – Glaoch 2 (Féilte idir 01 Meitheamh – 31 Nollaig)

Treoirlínte:

Cuireann na treoirlínte seo eolas ar fáil faoi Scéim na bhFeilte 2024 – Glaoch 2.

Cuideoidh siad leat:

- cinneadh a dhéanamh an bhfuil d'eagraíocht cáilithe le cur isteach ar mhaoiniú faoin scéim seo,
- iarratas a ullmhú ina bhfuil an t-eolas go léir atá de dhíth.

Léigh go cúramach iad, le do thoil, sula dtabharfaidh tú faoin iarratas a chomhlánú.

1. Mar gheall ar an scéim seo

Tá maoiniú á chur ar fáil ag Foras na Gaeilge do choistí cuí chun deis a thabhairt dóibh forbairt a dhéanamh ar fhéilte ealaíon nó ar ghnéithe d'fhéilte atá á reáchtáil agus á gcur i bhfeidhm trí mheán na Gaeilge nó a bhfuil na healaíona teangabhunaithe mar chuid lárnach díobh. Díríonn an scéim seo ar fhéilte a bhfuil mar aidhm acu an Ghaeilge, na healaíona teangabhunaithe, na healaíona dúchasacha Gaeilge agus oidhreacht na Gaeilge a chothú agus a chur chun cinn trí mheán na Gaeilge nó go dátheangach, mar dhlúthchuid den fhéile, agus ardán a chur ar fáil do phobal na Gaeilge, don mhórphobal agus d'earnáil na n-ealaíon. Lena chois sin sí aidhm na scéime deiseanna úsáide agus gréasáin a fhorbairt agus a chothú trí mheán na n-ealaíon.

Is le hairgead poiblí a bhronntar deontais, agus tá dualgais reachtúla ar Fhoras na Gaeilge chun luach ar airgead gach tionscadail mhaoinithe a dheimhniú.

Molann Foras na Gaeilge d'iarratasóirí cómhaoiniú a lorg le haghaidh tionscadal, nuair is cuí, agus comhoibriú le heagraíochtaí eile leis an luach is fearr a fháil ó dheontas Fhoras na Gaeilge.

Cuirimid fáilte faoi leith roimh iarratais ó eagraíochtaí atá suite i gceantair aitheanta i straitéisí agus/nó i reachtaíocht rialtais.

2. An féidir linne cur isteach air?

Le bheith incháilithe le cur isteach ar an scéim seo caithfidh d'eagraíocht a bheith in ann na critéir cháilitheacha seo a leanas a chomhlíonadh;

- Ní mór bunreacht a bheith ag coiste ghrúpa an iarratasóra
- Ní mór árachas dliteanais poiblí a bheith ag an iarratasóir
- Ní mór cuntas bainc a bheith ann in ainm na féile
- Ní mór uimhir bhailí le haghaidh sheirbhís ar líne na gCoimisinéirí Ioncaim a bheith ag an iarratasóir (más cuí)
- Ní mór teastas imréitigh cánach (más cuí) a bheith ag an iarratasóir
- Ní mór ráiteas a léiríonn tiomantas don Ghaeilge a bheith déanta ag an iarratasóir

Féadfaidh Foras na Gaeilge cur leis na critéir cháilitheacha seo.

Má tá aon cheist agat faoi ghné ar bith de na critéir cháilitheacha, is féidir leat teagmháil a dhéanamh le Foras na Gaeilge [roimh an spriocdháta](#).

3. Cad é mar a mheasfar na hiarratais?

Úsáideann Foras na Gaeilge critéir mheasúnaithe le hiarratais a mheasúnú. Tá critéir mheasúnaithe na scéime leagtha amach thíos. Measfaimid agus scórálfaimid iarratais de réir na gcritéar seo.

1.
 - (a) Is gá d'ábhar na féile agus líon agus tarraingteacht na n-imeachtaí a bheith trí mheán na Gaeilge, ag teacht le bun-aidhm na Scéime.
 - (b) Is gá samhlaíocht chlár oibre lucht réachtála na féile a bheith soiléir.
 - (c) Is gá líon rannpháirtithe intomhaiste.
2. Cuirfidh an fhéile le húsáid na Gaeilge i gcomhthéacs na n-ealaíon dúchasach a chur chun cinn trí aithriseoireacht, amhránaíocht, scéalaíocht, léamh scéalta, puipéadóireacht, drámaíocht, scannáin, litríocht, ealaíontóirí nua a chothú, nó réimse ar bith eile ealaíona a mheallfadh lucht freastail le Gaeilge.
3. Beidh an Ghaeilge lárnach ar chlár na féile agus ar ábhar bolscaireachta na féile.
4. Tá clár oibre ag an iarratasóir a leagann amach aidhm, cuspóir, straitéis, plean forbartha lucht féachana agus rannpháirtíochta, plean margaíochta etc. na féile.
5. Tá cumas bainistíochta agus riaracháin ag grúpa eagraithe na féile, a bhfuil d'fhianaise air struchtúr an ghrúpa agus a réimse saineolais agus speisialtóireachta.
6. Tabharfaidh an t-iarratasóir eolas maidir le maoiniú nó tacaíocht ó fhoinsí eile, is é sin urraíocht, úsáid ionaid, am deonach, maoiniú chomhchineáil, teacht isteach measta agus luach ar airgead.

Cé atá neamh-incháilithe mar iarratasóir?

- Eagraíochtaí reachtúla (e.g. comhairlí contae nó aon áisíneacht stáit eile)
- Ceanneagraíochtaí
- Fleánna Ceoil
- Aon iarratas a ndéantar stocaireacht faoi le haon chomhalta boird nó fostaí de chuid Fhoras na Gaeilge

Gníomhaíochtaí atá incháilithe do mhaoiniú tríd an scéim

- Imeachtaí ealaíon trí mheán na Gaeilge, atá na healaíona teangabhunaithe mar chuid lárnach díobh
- Deiseanna úsáide Gaeilge agus gréasáin shóisialta Ghaeilge
- Féilte a bhfuil úsáid na Gaeilge ar a gclár agus ar a n-ábhar bolscaireachta

Gníomhaíochtaí nach bhfuil incháilithe do mhaoiniú tríd an scéim

- Imeachtaí nach bhfuil na healaíona teangabhunaithe mar chuid lárnach díobh
- Dianchúrsaí/ranganna Gaeilge
- Imeachtaí trí mheán an Bhéarla
- Imeachtaí le linn féile a bhfuil maoiniú faighte nó iarrtha dóibh cheana féin nach gcuimsíonn imeachtaí Gaeilge

4. Cad é mar a chuirfimid isteach air?

Sula dtabharfaidh tú faoin bhfoirm iarratais a chomhlánú léigh na treoirínte ina n-iomláine arís agus déan cinnte go gcomhlíonann d'eagraíocht critéir cháilitheacha na scéime faoi mhír 2 thuas.

Ní ghlacfar le cóipeanna crua d'iarratais. Agus tú ag comhlánú an iarratais caithfidh tú gach ceist a fhreagairt.

Is é **12 meán lae Dé hAoine an 3 Bealtaine 2024** an spriocdháta le haghaidh iarratas.

Faoin eagraíocht féin atá sé a dhéanamh cinnte go bhfuil an t-iarratas comhlánaithe agus curtha isteach in am. **Ní ghlacfaidh Foras na Gaeilge le haon iarratas i ndiaidh an spriocdháta.**

Má tá aon cheist agat faoi ghné ar bith den iarratais, déan teagmháil le Foras na Gaeilge [roimh an spriocdháta](#).

5. Cad é a tharlóidh dár n-iarratas?

Déanfar gach iarratas bailí a mheas faoi na critéir luaite i mír 3 thuas.

Cuirfear an cinneadh maoinithe in iúl d'eagraíochtaí.

Cealófar aon iarratas a ndéantar stocaireacht faoi le haon chomhalta boird nó le haon fhostaí de chuid Fhoras na Gaeilge.

Cealófar aon iarratas ina dtugtar eolas míchruinn.

Is é feidhmeannas Fhoras na Gaeilge atá freagrach as gach cinneadh faoi gach tionscadal atá le maoiniú, agus a chuirfidh gach cinneadh maoinithe i gcrích.

6. Má éiríonn lenár n-iarratas?

Má éiríonn le d'iarratas cuirfimid tairiscint chugat ina mbeidh gach eolas ábhartha maidir le híocaíocht agus monatóireacht dheontas na scéime.

Conradh dlíthiúil a bheidh sa tairiscint seo agus ní mór cloí le téarmaí agus coinníollacha an chonartha sin. Is féidir go ndéanfar aon sciar den deontas nó an deontas ar fad a chealú nó a aisghairm má sháraítear aon cheann de théarmaí nó coinníollacha an chonartha.

Ní mór cuntas bainc a bheith ann in ainm na heagraíochta, agus é a bheith faoi stiúir coiste nó boird. Is cóir gach íocaíocht ó dheontas Fhoras na Gaeilge a íoc as an gcuntas seo le go mbeidh cuntas scríofa ar fáil ar gach íocaíocht (e.g. seic, dochar díreach, cárta bainc a bhaineann leis an chuntas, BACS etc.).

Níl sé ceadmhach cárta pearsanta bainc/cárta Visa nó eile a úsáid agus ní cheadófar aisíocaíochtaí ón gcuntas chuig cárta pearsanta in aon chás.

Ní chuirfidh Foras na Gaeilge maoiniú ar fáil d'íocaíochtaí a dhéantar le hairgead tirim.

Ní dhéanfaidh Foras na Gaeilge aon mhaoiniú ar chaiteachas nach bhfuil ceadaithe roimh ré. Ní íocfar aon deontas go siarghabhálach.

7. Cad é mar is féidir liom aiseolas a thabhairt, gearán a dhéanamh nó achomharc a lorg?

Cuireann Foras na Gaeilge fáilte roimh aon mholtaí nó aiseolas a bheadh agat faoin scéim seo.

Má tá ábhar gearáin agat faoin scéim seo is féidir sin a chur in iúl d'Fhoras na Gaeilge chomh maith.

Tá córas achomhairc i bhfeidhm ag Foras na Gaeilge. Mura bhfuil tú sásta leis an gcinneadh a rinneadh maidir le d'iarratas, is féidir leat athbhreithniú a lorg i scríbhinn taobh istigh de cheithre lá dhéag ó dháta na tairisceana faoin gcinneadh. Ní mór gach iarraidh ar athbhreithniú a bhunú ar na cúiseanna seo amháin:

- I. Go ndearna Foras na Gaeilge míléamh ar an eolas a tugadh i rith an mheasúnaithe.
- II. Gur imigh Foras na Gaeilge, ar dhóigh shubstaintiúil, ón bpróiseas measúnaithe féin.